

«Ella avess da midar domicil»

Pld grischuna: Apero da Bumaun

DA GION NUTEGN STGIER / ANR

■ **En vista a las elecziuns naziunalas saja in'allianza cun la pps ed er cun la ps grischuna nunrealistica, han ils exponents da la pld grischuna ditg. Cun autras partidas saja quai plitost il cas. La finamira saja clera d'esser suenter las elecziuns svizas danovamain represchentada en il cussegl naziunal.** Tradizionalmain ha l'apero da Bumaun da la Partida liberaldemocratica ils liberals dal Grischun (pld) gè lieu en il chastè dal viticultur *Gian-Battista von Tschärner* a Rehanau. L'interess per quel è stà fitg grond e blers liberals èn cunzunt er vegnids per assister al referat da *Petra Gössi*, la presidenta svizra da la pld.

Da carstgauns per carstgauns

Petra Gössi, la presidenta da la pld svizra, ha ina clera finamira per las elecziuns naziunalas. Ella vul cunzunt acquistar tar quellas elecziuns dals 20 d'october 2019 dapli sez che la ps. Da persvader ils Svizzers saja cunzunt che la pld fetschia politica da carstgauns per carstgauns. Ultra da quai s'engaschia ella per ina societad multifara e per valurs communaivlas. Il pensar social, er quel saja per la pld da gronda muntada. La solidaritad, er quella na dastga betg mancar. En Svizra haja mintgin plaz, ha ditg Gössi. Viver cun tut las cuntradas, tgirar la natira e nagina differenza tranter las regiuns e las citads, er quai saja per la pld da grond'impurtanza.

Svilup per tuts

Il servetsch a favur dals umans, quel saja per la pld indispensabel, ha menziunà Gössi. Ella ha er ditg che la pld s'engaschia en l'avegnir cunzunt per in svilup general en Svizra. Ultra da quai dovra la Svizra ils contacts bilaterals tar l'exteriur, ina buna raìt politica tar las cunvegns libras e damain suveranità tar las cunvegns da basa. Gist tar quellas saja da chattar ina buna soluziun e da savair

tgenins èn ils avantatgs e tgenins èn ils dischavantatgs.

Encunter singuls artitgels

Sin dumonda ha *Bruno W. Claus*, il president da la pld grischuna, ditg cleramain ch'ina colliaziun da glistas cun la pps grischuna vegnia insumma na en dumonda tar las elecziuns naziunalas. Er in'allianza cun la ps grischuna na saja segir nagin tema, ha el manegià. La finamira da la pld grischuna saja da gudagnar enavos il sez pers en il cussegl naziunal avant otg onns. Cun ina colliaziun da glistas cun la pps ed er cun la ps na saja quai betg pussaivel. Persuenter fiss quai in pulit agid da far anc dapliras vuschs per la pps sco er per la ps, ha menziunà Claus. Encunter singuls artitgels en las gasettas grischunas vegnia quella colliaziun da glistas segir na ad avair lieu, ha accentuà il president dals liberals grischuns.

Quintà cun ina candidatura da Jon Pult

La candidatura dubla da *Jon Pult* (ps), quella per il cussegl naziunal e cunzunt er quella per il cussegl dals chantuns, na saja strusch ina surpraisa, ha menziunà *Martin Schmid*, el che represchenta cun *Stefan Engler* (pcd) noss chantun en la chombra pitschna a Berna. Il cumbat electoral, quel fetschian els dus danovamain communaivel sco gia avant quater ed er avant otg onns, ha ditg Schmid. Da sa preschentar al suveran grischun sco ferm duo per il cussegl dals chantuns haja tar las davosas duas elecziuns purtà fritgs, ha menziunà Schmid. Da quintar hajan bain el ed er Engler cun ina concorrenza da la pps, dentant *Heinz Brand* haja pauc interess da midar da la chombra gronda en la chombra pitschna. Vuless cussegliera *Magdalena Martullo* far quai e vegnir elegidà avess ella da midar domicil da Turitg en il Grischun e quai na fetschia ella strusch. Schmid è però da l'avis che sia reelecziun sco cusseglier dals chantuns saja tuttina clera.



Stada da la partida a l'occurrèza da la pld grischuna è er la presidenta svizra dals liberals: Bruno W. Claus, president pld grischuna, Christian Rathgeb, cusseglier guvernativ, Petra Gössi, presidenta pld Svizra e Martin Schmid, cusseglier dals chantuns (da san.).



Da la partida a l'occurrèza da la pld er ils candidats e las candidatas per il cussegl naziunal: Andreas Züllig, Martin Bundi, Anna Giacometti, Vera Stiffler e Michael Pfäffli (da san.).